

SARS E NTLAFATSA LETSHOLO LA BOIKOBELO BA TEFO YA LEKGETHO

PRETORIA, Labobedi, 20 Pudukwana 2018 - Ditshebeletso tsa Lekgetho tsa Afrika Borwa (SARS) di boetse di kena letsholong la naha ka bophara ho hlokomedisa le ho hopotsa balefalekgetho ka boitlamo ba bona ba ho nehelana ka dikgutliso tse morao tsa lekgetho.

Letsholo lena la dibeke tse tharo, le qalang kajeno, le shebane ka ho qolleha le dikgwebo le ho di kgothaletsa ho ikobela Lekgetho la Lekenno la Kgwebo (CIT), Lekgetho la Boleng bo ekeditsweng (VAT) mmoho le Lekgetho la Lefa ha o ntse o fumana moputso (PAYE). Ka nako ya letsholo lena, ho tla boela ho buisanwa ka tse mabapi le boitlamo ba balefalekgetho, nyehelo ya dikgutliso tsa lekgetho mmoho le diphetho tse amanang le ho se nyehelane ka dikgutliso. SARS e tla boela e ntshetsa balefalekgetho ba amehang mangolo a ho qetela a tseko.

Le ha Sehla sa Lekgetho se kwetswe ka la 31 Mphalane 2018, ba fetilweng ke letsatsi lena la makgaolakang ba ntse ba lebelletswe ho faela dikgutliso tsohle tsa lekgetho tse salletseng morao mme ho ka nna ha ba le dikotlo bakeng sa ba hlolehang ho faela. Balefalekgetho ba nakwana ba na le ho fihlela ka la 31 Pherekong 2019 ho faela dikgutliso tsa bona tsa lekgetho ka eFiling.

Balefalekgetho ba sa nehelaneng ka dikgutliso tsa bona ba fumantsywa kotlo, mme ena e ka ba ho tloha ho R250 ho isa ho R16 000 ka kgwedi, ho itshetlehlilwe hodima lekenno le lefiswang lekgetho la molefalekgetho. Ke tlolo ya molao ho se nehelane ka kgutliso ya hao ya lekgetho mme ha o ntse o tswela pele ho se natse boikobelo bona sena se tla lebisa hore o tshotjhisetswe ho se ikobele molao.

SARS e ikemiseditse ho nehelana ka tshebeletso le thuto ho balefalekgetho ba hlokang thuso ena. Balefalekgetho ba kgothaletswa ho letsetsa SARS Contact Centre ho 0800 00 SARS 7277, kapa ba etele makala afe kapa afe a SARS mme ba tle le nomoro tsa bona tsa referense ya lekgetho.